

57

Na osnovu poglavlja V. odjeljka B. člana 45. c/ Ustava Hercegovačko-neretvanskog kantona, donosim

ČUKAZ

o proglašenju Zakona o predškolskom odgoju

Proglasa se Zakon o predškolskom odgoju Hercegovačko-neretvanskog kantona koji je donijela Skupština Hercegovačko-neretvanskog kantona na 11. sjednici održanoj 27. juna 2000. godine.

Broj: 01-I 079 /00

Mostar, 25. jula 2000. godine

GUVERNER
Rade Bošnjak, s. r.

ZAKON

o predškolskom odgoju

I. OPĆE ODREDBE

Član 1.

Ovim Zakonom se uređuje zaštita, odgoj i obrazovanje djece predškolske dobi (u daljem tekstu: predškolski odgoj) kao dio sveukupnog odgojno-obrazovnog sistema Hercegovačko-neretvanskog kantona (u daljem tekstu: Kanton). Predškolski odgoj obuhvata primarne, odnosno redovne programe i specijalizovane, odnosno posebne programe čijom primjenom se osigurava odgoj, obrazovanje, zdravstvena zaštita, prehrana i socijalna zaštita djece predškolske dobi.

Predškolski odgoj ostvaruje se u dječijim vrtićima, specijalizovanim dječijim vrtićima, igraonicama i drugim predškolskim ustanovama (u daljem tekstu: dječiji vrtić) u skladu sa ovim Zakonom i drugim propisom.

Član 2.

U dječijim vrtićima, kao javnim ustanovama, programi predškolskog odgoja ostvaruju se kao djelatnost javne službe. Pod javnom službom podrazumijeva se trajno i nesmetano obavljanje djelatnosti predškolskog odgoja u javnom interesu općina i Kantona.

Član 3.

Općine i Kanton u javnom interesu imaju pravo i obavezu odlučivati o potrebama građana za organizovanjem i ostvarivanjem programa predškolskog odgoja na svom području, te radi zadovoljavanja tih potreba građana osnivaju dječije vrtiće.

Član 4.

Predškolski odgoj organizuje se i sprovodi za djecu u pravilu od navršene jedne (1) godine života pa do polaska u osnovnu školu.

Predškolski odgoj ostvaruje se u skladu s razvojnim psihofizičkim sposobnostima predškolske djece, te u skladu s jezičnim, socijalnim, kulturnim, vjerskim i drugim potrebama i osjećajima roditelja djece.

Član 5.

U dječijim vrtićima predškolski odgoj se obavlja na bosanskom jeziku ili hrvatskom jeziku i latiničnom pismu. Predškolski odgoj djece pripadnika etničkih i nacionalnih zajednica ili manjina ostvarivat će se u skladu sa ovim Zakonom i drugim propisom.

Član 6.

Predškolski odgoj ostvaruje se u skladu sa Pedagoškim standardom predškolskog odgoja (u daljem tekstu: Pedagoški standard) i Normativom predškolskog prostora, opreme i didaktičkih sredstava predškolskog odgoja (u daljem tekstu: Normativ). Pedagoški standard i Normativ iz stava 1. ovog člana donosi Ministarstvo obrazovanja, nauke, kulture i sporta Kantona (u daljem tekstu: Ministarstvo).

II. OSNIVANJE I POČETAK RADA DJEČIJEV VRTIĆA

1. Osnivanje dječijeg vrtića

Član 7.

Dječiji vrtić osniva općina u skladu sa javnim interesom i programom potreba razvoja predškolskog odgoja na svom području. Dvije ili više općina mogu osnovati dječiji vrtić. Vlada kanton može biti osnivačem dječijeg vrtića u privredno i ekonomski nerazvijenim općinama ili kada osniva dječiji vrtić za Djecu predškolke dobi s posebnim potrebama. Dječiji vrtić mogu osnovati i druge domaće pravne i fizičke osobe (u daljem tekstu: dječiji vrtić u privatnom vlasništvu) uz prethodno pribavljenu saglasnost nadležnog općinskog tijela uprave nadležnog za pitanja odgoja i obrazovanja prema mjestu sjedišta dječijeg vrtića.

Član 8.

Akt o osnivanju dječijeg vrtića u vlasništvu općine donosi općinsko vijeće. Kad je dječiji vrtić u zajedničkom vlasništvu dvije ili više općina akt o osnivanju donose sporazumno općinska vijeća tih općina. Vlada donosi akt o osnivanju dječijeg vrtića u vlasništvu Kantona. Akt o osnivanju dječijeg vrtića u privatnom vlasništvu donosi domaća pravna ili fizička osoba koja ga osniva.

Član 9.

Akt o osnivanju dječijeg vrtića pored uslova propisanih

Zakonom o ustanovama obavezno sadrži i uslove o:

1. programu rada dječijeg vrtića te načinu i uslovima njegovog ostvarivanja,
2. osiguranim odgajateljima, stručnim saradnicima i dr. radnicima,
3. osiguranom prostoru, opremi i finansijskim sredstvima,
4. postojanju direktora, odnosno vršioca dužnosti direktora i
5. regulisanim drugim međusobnim pravima i obavezama osnivača i dječijeg vrtića.

Član 10.

Osnivač dječijeg vrtića iz stava 1., 2. i 4. člana 7. ovog Zakona dužan je akt osnivanju dostaviti Ministarstvu radi ocjene saglasnosti tog akta sa Zakonom.

2. Upis dječijeg vrtića u registar

Član 11.

Osnivač podnosi prijavu za upis dječijeg vrtića u Registar ustanova kod nadležnog suda i Registar dječijih vrtića Ministarstva (u daljem tekstu: Registre).

Za upis u Registre iz stava 1. ovog člana osnivač dostavlja nadležnom organu koji obavlja upis određenih podataka, ocjena i saglasnosti koje je obvezan osigurati u skladu sa ovim Zakonom i drugim propisom.

Upisom u registre iz stava 1. ovog člana dječiji vrtić stiče pravnu i poslovnu sposobnost.

Dječiji vrtić ima pravo na pečat u skladu sa kantonalnim Zakonom o pečatu.

3. Početak obavljanja djelatnosti dječijeg vrtića

Član 12.

Uslove koje dječiji vrtić treba ispuniti da bi mogao početi s obavljanjem djelatnosti su:

1. elaborat osnivača o opravdanosti potrebe osnivanja dječijeg vrtića,
2. odobren program rada,
3. potreban broj djece za formiranje najmanje dvije odgojne grupe,
4. potreban broj odgajatelja, stručnih saradnika i ostalih zaposlenih,
5. osiguran prostor, opremu i druga didaktička sredstva potrebna za trajno obavljanje predškolskog odgoja u skladu sa Pedagoškim standardom i Normativom,
6. osigurana novčana sredstva za osnivanje i rad dječijeg vrtića i
7. ispunjenost drugih uslova propisanih ovim Zakonom i drugim propisom.

Član 13.

Prije početka obavljanja djelatnosti osnivač je obvezan podnijeti zahtjev Ministarstvu za utvrđivanje ispunjenosti uslova za početak rada dječijeg vrtića iz člana 9. i člana 12. ovog Zakona.

Stručna komisija utvrđuje stepen ispunjenosti uslova za početak rada i predlaže Ministarstvu određeno rješenje.

Član 14.

Odluku o odobrenju početka obavljanja djelatnosti predškolskog odgoja dječijem vrtiću daje Ministarstvo na temelju predloženog rješenja stručne komisije.

4. Zabранa obavljanja djelatnosti.

Član 15.

Kada dječijem vrtiću u toku rada nastupe određene okolnosti koje mu otežavaju ili sprječavaju obavljanje djelatnosti na način utvrđen ovim Zakonom i drugim propisom prosvjetni ili drugi nadležni inspektor nakon bezuspješno poduzetih mjera može zabraniti daljnje obavljanje djelatnosti i predložiti nadležnom općinskom tijelu uprave da pokrene postupak o ukidanju i brisanju iz Registra tog dječijeg vrtića.

5. Plan razvoja dječijih vrtića

Član 16.

Općinska tijela uprave nadležna za pitanja odgoja i obrazovanja utvrđuju plan izgradnje dječijih vrtića u skladu sa javnim interesom i programom razvoja predškolskog odgoja na svom području i predlažu općinskom vijeću na usvajanje.

Na osnovu utvrđenih planova i programa razvoja dječijih vrtića iz stava 1. ovog člana općinska vijeća donose odluku o mreži dječijih vrtića za područje općine i objavljaju je u općinskim službenim novinama.

III. PROGRAMI DJEČIJIH VRTIĆA

Član 17.

U dječijem vrtiću ostvaruje se:

1. primarni program, odnosno redovni program njege, odgoja, obrazovanja, zdravstvene zaštite, prehrane i socijalne zaštite djece predškolske dobi s normalnim psihofizičkim razvojem
2. specijalizovani program, odnosno program za djece s posebnim potrebama (predškolske dobi) obuhvaća:
 - a) program za djecu s teškoćama u psihofizičkom

Hercegovačko-neretvanskog kantona

razvoju,

b) program za nadarenu djecu, odnosno talentovanu djecu,

c) program ranog učenja stranih jezika i umjetničke programe,

d) program za djecu pripadnika etničkih i nacionalnih manjina ili zajednica i

e) program predškole, odnosno pripremanje djece za osnovno obrazovanje.

Pored programa utvrđenih u stavu 1. tački 1.i 2.ovog člana dječiji vrtić može izvoditi i druge programe ukoliko za njihovo izvođenje osnivač ili drugi zainteresovani subjekat osigura finansijska sredstva.

Član 18.

U izradi i utvrđivanju prijedloga programa iz člana 17. ovog Zakona sudjeluju i predstavnici zaposlenih u dječijim vrtićima. Sve vrste programa koji se odnose na odgoj i obrazovanje predškolske djece donosi Ministarstvo.

Član 19.

Ostvarivanjem programa iz člana 17. ovog Zakona dječiji vrtići stvaraju primjerene uslove za normalan rast i razvoj svakog djeteta i dopunjavaju porodični odgoj i obrazovanje predškolske djece, njihovu lakšu socijalizaciju u društvenu zajednicu i bolje uklapanje u školski odgojno-obrazovni sistem.

Član 20.

U dječijim vrtićima predškolski odgoj djece s teškoćama u psihofizičkom razvoju može se izvoditi po posebnim programima i metodama rada u sklopu redovnog dječijeg vrtića ili u dječijim vrtićima za djecu s posebnim potrebama predškolske dobi.

Vrstu i stupanj teškoće u razvoju djeteta te potrebu osiguranja predškolskog odgoja djece s teškoćama u psihofizičkom razvoju utvrđuje stručna komisija formirana u skladu sa posebnim propisom kojeg donosi Ministarstvo.

Član 21.

U dječijem vrtiću može se organizovati rad sa nadarenom djecom predškolske dobi u skladu sa posebnim programom. Postupak i mjerila za utvrđivanje nadarenosti djece predškolske dobi, način i uslovi rada s nadarenom djecom predškolske dobi regulišu se posebnim propisom, kojeg donosi Ministarstvo.

Član 22.

Programe zdravstvene zaštite, higijene i pravilne prehrane djece u dječijim vrtićima utvrđuje i donosi Minis-

tarstvo zdravstva Kantona. Programe socijalne zaštite u dječijim vrtićima utvrđuje i donosi Ministarstvo rada i socijalne zaštite Kantona. Prije donošenja programa iz stava 1. i 2. ovog člana navedena ministarstva konsultuju resorno Ministarstvo.

Član 23.

U dječijem vrtiću sprovodi se predškolski odgoj s djecom raspoređenom u grupe cjelodnevnom, poludnevnom ili kraćeg dnevnog boravka. Uređenje i sprovođenje predškolskog odgoja u dječijem vrtiću iz stava 1.ovog člana odvija se na osnovu odgovarajućeg programa u skladu sa ovim Zakonom.

Član 24.

Prioritet pri upisu djece u dječiji vrtić čiji je osnivač općina, odnosno općine ili Kanton utvrđuje se općim aktom dječijeg vrtića, a na njega saglasnost daje općinsko tijelo uprave nadležno za pitanje predškolskog odgoja prema mjestu sjedišta dječijeg vrtića.

Član 25.

Dječiji vrtić obavlja djelatnost na osnovu Godišnjeg plana i programa rada koji se donosi za pedagošku godinu koja traje, u pravilu, od 1.septembra do 31.avgusta sljedeće godine. Godišnji plan i program rada obuhvaća programe odgoja i obrazovanja, programe zdravstvene zaštite djece, higijene i prehrane, programe socijalne zaštite kao i druge programe koje dječiji vrtić ostvaruje u sporazumu s roditeljima djece i osnivačem. Godišnji plan i program rada dužan je donijeti Upravni odbor dječijeg vrtića do 30. septembra za tekuću pedagošku godinu.

Član 26.

Veličinu dječijeg vrtića zavisno o broju odgojnih grupa djece, broju djece u odgojnim grupama, dob djece u pojedinim odgojnim grupama, veličini prostorija za boravak, potrebnu opremljenost dječijeg vrtića, te neposredni rad odgajatelja u grupi određuje osnivač aktom o osnivanju u skladu sa Pedagoškim standardom i Normativom.

Član 27.

Rad s djecom predškolske dobi može se organizovati u jaslicama i vrtićnim odgojnim grupama, a programi se ostvaruju:

1. u dječijim vrtićima

2. u specijalizovanim dječijim vrtićima, odnosno dječijim vrtićima za djecu s posebnim potrebama predškolske dobi i

3. u igraonicama koje se mogu otvarati pri dječijim

vrtićima, školskim, zdravstvenim, socijalnim, kulturnim, sportskim i drugim ustanovama. Programom i radom igraonice kao jedinice predškolskog odgoja u sastavu pravne osobe iz stava 1. tačke 3. ovog člana rukovodi voditelj igraonice u skladu s aktom o osnivanju i pravilima pravne osobe u čijem sastavu je igraonica. Akt o osnivanju igraonice kao jedinice predškolskog odgoja donosi pravna osoba u čijem sastavu će djelovati igraonica u skladu sa ovim zakonom i drugim propisom. Igraonica u sastavu određene pravne osobe nije samostalni pravni subjekat.

IV. RADNICI

1.Odgajatelji i stručni saradnici

Član 28.

U dječjem vrtiću na poslovima njegе, odgoja i obrazovanja, socijalne i zdravstvene zaštite, te brige o djeci mogu raditi radnici koji pored općih uslova utvrđenih zakonom imaju odgovarajuću stručnu spremu i položen stručni ispit.

Radnici dječjeg vrtića iz stava 1. ovog člana su:

1. odgajatelji s višom stručnom spremom za rad s djecom od navršene u pravilu jedne (1) godine života do polaska u školu,
2. odgajatelji s visokom stručnom spremom za rad s djecom koja imaju teškoće u psiho-fizičkom razvoju,
3. medicinska sestra, sa srednjom ili s višom stručnom spremom i
4. nastavnici i odgajatelji za posebne programe, s visokom ili višom stručnom spremom.

Vrstu i stepen stručne spreme odgajatelja, stručnih saradnika i ostalih zaposlenih u dječjem vrtiću propisuje Ministarstvo posebnim propisom.

Član 29.

Za odgajatelja, stručnog saradnika i rukovodećeg radnika ne može biti izabrana osoba koja je pravosnažno osuđena za krivično djelo koje ih čini nedostojnim za obavljanje poslova i radnih zadataka predškolskog odgoja.

Nedostojnost za obavljanje predškolskog odgoja iz stava 1. ovog člana u svakom pojedinačnom slučaju ocjenjuje nadležni organ dječjeg vrtića.

2. Izbor odgajatelja i stručnih saradnika

Član 30.

Odgajatelji i stručni saradnici biraju se na osnovu javnog konkursa. Javni konkurs raspisuje Upravni odbor u dnevnim sredstvima javnog informisanja, a sprovodi

ga konkursna komisija. S odgajateljem i stručnim saradnikom može se sklopiti ugovor o radu na određeno vrijeme u skladu sa Zakonom o radu.

Ako se na raspisani konkurs ne javi osoba koja ispunjava uslove utvrđene ovim Zakonom i drugim propisom, može se izabrati osoba koja ispunjava propisane uslove s tim što je dječiji vrtić obavezan raspisati novi konkursnajmanje jednom u šest (6) mjeseci sve do popune radnog mjesta u skladu sa ovim Zakonom i drugim propisom.

Član 31.

Odluku o izboru odgajatelja i stručnih saradnika na osnovu prijedloga konkursne komisije donosi Upravni odbor. Način izbora odgajatelja i stručnih saradnika dječjeg vrtića u privatnom vlasništvu uređuje se aktom o osnivanju, pravilima i drugim općim aktom dječjeg vrtića u privatnom vlasništvu.

Član 32.

Odgajatelji i stručni saradnici koji se nalaze u radnom odnosu na neodređeno vrijeme mogu, iz opravdanih razloga, u drugom dječjem vrtiću zasnovati radni odnos bez konkursa, u skladu sa Zakonom o radu.

Radni odnos iz stava 1. ovog člana zasniva se ugovorom o sporazumnoj preuzimanju radnika koji zaključuju ugovorne strane u skladu sa zakonom o radu.

Član 33.

Raspored radnog vremena odgajatelja, stručnih saradnika i drugih zaposlenih u sastavu utvrđenog broja sati radne sedmice reguliše se Pravilima ili drugim općim aktom dječjeg vrtića u skladu sa Zakonom o radu.

Član 34.

Odgajatelji i pedagozi koriste, u pravilu, godišnji odmor u vremenu u kome se ne realizuju sadržaji predškolskog odgoja i može trajati najviše trideset (30) radnih dana. Radnici iz stava 1. ovog člana ukoliko iz opravdanih razloga, što ocjenjuje direktor, ne iskoriste godišnji odmor u vremenu navedenom u stavu 1. ovog člana, mogu odmor koristiti najkasnije do 30. juna naredne kalendarske godine.

Ostali zaposleni dječjeg vrtića koriste godišnji odmor u skladu sa odredbama utvrđenim općim aktom dječjeg vrtića.

3.Pripravnici

Član 35.

Odgajatelj i stručni saradnik koji se prvi put zapošljava u dječjem vrtiću zasniva radni odnos kao pripravnik. Pripravnički staž traje, u pravilu, godinu dana, ali ne

kraće od trajanja pedagoške godine. Nakon obavljenog pripravničkog staža pripravnik stiče pravo polagati stručni ispit. Pripravniku prestaje radni odnos u dječjem vrtiću ukoliko ne položi stručni ispit u roku od jedne (1) godine od dana kada mu je istekao pripravnički staž.

Član 36.

Rok iz stava 4. člana 35. ovog Zakona ne teče za vrijeme privremene nesposobnosti za rad, porodiljskog dopusta, vojne službe i sl. Odluku o opravdanosti razloga iz stava 1. ovog člana donosi direktor dječijeg vrtića na osnovu relevantnih dokaza.

Član 37.

Odgajatelj i stručni saradnik može volonterskim radom u dječjem vrtiću obaviti pripravnički staž i nakon toga imati pravo polagati stručni ispit. Postupak polaganja stručnog ispita kao i program obavljanja pripravničkog staža uređuje se posebnim propisom koji donosi Ministarstvo.

4. Stručno usavršavanje i napredovanje odgajatelja i stručnih saradnika u struci

Član 38.

Odgajatelji i stručni saradnici obavezni su se stalno usavršavati u struci. Program i način usavršavanja iz stava 2. ovog člana uređuje Ministarstvo posebnim propisom.

Član 39.

Odgajatelji i stručni saradnici mogu, dok su u radnom odnosu, napredovati u struci i sticati zvanja mentora i savjetnika. Postupak, način i uslove za napredovanje u struci i sticanje zvanja iz stava 1. ovog člana uređuje Ministarstvo posebnim propisom.

5. Prestanak radnog odnosa odgajatelja i stručnih saradnika

Član 40.

Odgajatelji i stručni saradnici obavljaju sistematski ljekarski pregled, u pravilu, na početku svake pedagoške godine o trošku osnivača.

Odgajatelj i stručni saradnik kojem se u toku rada u dječjem vrtiću naruši psihofizičko stanje do te mjere da bitno smanjuje njegovu radnu sposobnost može se uputiti na ljekarski pregled i prije roka utvrđenog u stavu 1. člana 38. ovog Zakona.

Odluku o upućivanju na ljekarski pregled donosi Upravni odbor na prijedlog direktora.

Odgajatelju i stručnom saradniku koji odbije izvršiti odluku iz stava 2. ovog člana može prestati radni odnos u dječjem vrtiću.

Član 41.

Ako se nalazom nadležne zdravstvene ustanove, potvrdi da je radna sposobnost odgajatelja ili stručnog saradnika bitno narušena, Upravni odbor donosi odluku o oslobođanju odgajatelja ili stručnog saradnika neposrednog rada s djecom te ga, ako postoji mogućnost, raspoređuje na drugo radno mjesto u skladu sa preostalom radnom sposobnošću i stručnoj spremi. Ako ne bude mogućnosti raspoređivanja u smislu stava 1. ovog člana, dječiji vrtić u saradnji s osnivačem dužan je osigurati mu naknadu plate u skladu sa Zakonom o radu.

Odgajatelju i stručnom saradniku koji odbije raspored iz stava 1. ovog člana prestaje radni odnos u dječjem vrtiću bez obaveze osiguranja prosječne plate.

Član 42.

Odgajatelju i stručnom saradniku radni odnos prestaje:

1. ako nastupe okolnosti iz člana 29., člana 40. stava 3. i člana 41. stava 3. ovog Zakona,

2. ako direktor ili drugi nadležni organ utvrde da odgajatelj ili stručni saradnik ne ostvaruje programe u skladu sa ovim Zakonom i drugim propisom,

3. ako ne položi stručni ispit u propisanom roku i
4. u drugim slučajevima utvrđenim ovim Zakonom i Zakonom o radu.

Odluku o prestanku radnog odnosa donosi Upravni odbor na prijedlog direktora dječijeg vrtića.

6. Vježbaonice i probni rad u dječijim vrtićima

Član 43.

U dječijem vrtiću mogu se ostvarivati :

1. programi vježbaonice za potrebe praktičnog osposobljavanja studenata,

2. probni programi radi naučnih istraživanja u cilju unapređivanja predškolskog odgoja u dječjem vrtiću i

3. stručno-razvojni programi radi usavršavanja svojih kadrova i unapređivanja stručnog rada.

Način rada i mjerila za sufinansiranje programa iz ovog člana utvrđuje osnivač u saradnji sa subjektom koji pokaže da ima interesa za realizaciju određenog programa iz ovog člana.

V. UPRAVLJANJE DJEČIJIM VRTIĆEM

Član 44.

Dječiji vrtić za organ upravljanja i poslovnog rukovođenja

može koristiti naziv (ime) kao što je upravno vijeće ili Upravni odbor, ravnatelj ili direktor.

Upravni odbor može imati od pet (5) do devet (9) članova.

Najmanje dva (2) člana Upravnog odbora imenuje osnivač, a ostali članovi biraju se iz reda roditelja djece, odgajatelja i stručnih saradnika dječijeg vrtića.

Mandat članova Upravnog odbora traje četiri (4) godine.

Omjer i broj članova Upravnog odbora, postupak izbora i imenovanja, način rada i donošenja pravno valjanih odluka bliže se uređuje aktom o osnivanju, Pravilima i drugim općim aktom dječijeg vrtića.

Član 45.

Upravni odbor kao organ upravljanja osim ovlaštenja datih Zakonom o ustanovama ima i slijedeća ovlaštenja:

1. odlučuje o sticanju, opterećenju i otuđivanju imovine dječijeg vrtića pod uslovima propisanim zakonom, aktom o osnivanju i pravilima,
2. donosi pravila i druga opća akta dječijeg vrtića,
3. pokreće inicijativu i traži od osnivača i nadležnog tijela uprave saglasnost za određene statusne promjene,
4. na propisan način donosi odluku o statusnim promjenama na koje je data saglasnost i prijavljuje njihov upis u Registre,
5. odlučuje o mjerilima i kriterijima upisa djece,
6. odlučuje o zasnuvanju i prestanku radnog odnosa s odgajateljima i stručnim saradnicima,
7. rješava po zahtjevu o upravnoj stvari iz svog djelokruga,
8. rješava o žalbama kao drugostepeni organ i
9. obavlja i druge poslove utvrđene zakonom, aktom o osnivanju i pravilima dječijeg vrtića.

Član 46.

Direktor je poslovodni organ i stručni rukovodilac dječijeg vrtića.

Pored poslova utvrđenih Zakonom o ustanovama direktor dječijeg vrtića obavlja i sljedeće poslove:

1. sarađuje s organima i tijelima općinske i kantonalne vlasti i najbližim okruženjem dječijeg vrtića,
2. predlaže godišnji plan i program rada,
3. brine se za sprovodenje odluka Upravnog odbora, odgajateljskog odbora i drugih organa tijela dječijeg vrtića,
4. rukovodi sjednicama odgajateljskog odbora,
5. daje prijedlog za zasnuvanje i prestanku radnog odnosa,
6. vrši primanje radnika u slučajevima prenjeđenim zakonom, Pravilima i drugim općim aktom dječijeg vrtića.

7. obavlja i druge poslove utvrđene ovim Zakonom, aktom o osnivanju i Pravilima

Član 47.

Za direktora dječijeg vrtića može biti imenovana osoba koja pored općih uslova utvrđenih zakonom ispunjava i uslove za odgajatelja ili stručnog saradnika i koja ima najmanje tri (3) godine rada u djelatnosti predškolskog ili ima najmanje pet (5) godina rada u društvenim djelatnostima, i koja mora imati ili visoku ili višu stručnu spremu.

Direktor se bira na osnovu javnog konkursa koji raspisuje Upravni odbor dječijeg vrtića u dnevnim sredstvima javnog informisanja, a sprovodi ga konkursna komisija. Direktora dječijeg vrtića imenuje i razrješava Upravni odbor uz prethodno pribavljenu saglasnost osnivača.

Član 48.

Direktor dječijeg vrtića se imenuje na četiri (4) godine i ista osoba može biti ponovno imenovana.

Ako se na raspisani konkurs niko ne prijavi, odnosno niko od prijavljenih kandidata ne bude imao propisane uslove ili ako osnivač odbije dati saglasnost na predloženog kandidata, konkurs se mora ponoviti. Do izbora direktora na osnovu ponovljenog konkursa Upravni odbor će na prijedlog osnivača imenovati vršioca dužnosti direktora najduže do godinu dana.

Član 49.

Kada prosvjetna inspekcija Ministarstva obavljači upravni nadzor utvrdi veće nepravilnosti i nezakonitosti u poslovanju dječijeg vrtića i radu direktora može naložiti Upravnom odboru da razriješi direktora dalje dužnosti. Ukoliko Upravni odbor ne postupi po rješenju inspekcijskog organa Ministarstva iz stava 1. ovog člana, Ministarstvo će naložiti osnivaču dječijeg vrtića da u ovom slučaju poduzme zakonom predviđene mjere.

Član 50.

Odredbe ovog Zakona i drugih propisa koji se odnose na postupak imenovanja, trajanje mandata i razrješenje direktora i članova Upravnog odbora ne primjenjuje se na dječiji vrtić u privatnom vlasništvu.

Izbor i imenovanje direktora i članova Upravnog odbora iz stava 1. ovog člana obavlja se u skladu s aktom o osnivanju i Pravilima dječijeg vrtića u privatnom vlasništvu.

Član 51.

Ako se ista osoba ponovo ne imenuje za direktora, dječiji vrtić u saradnji s osnivačem dužan je osigurati mu radno mjesto u skladu s njegovom stručnom spremom, radnom sposobnošću i su dužni osigurati mu primanje naknade plate u skladu sa Zakonom o radu.

VI. STRUČNI ORGANI**Član 52.**

Za stručne organe u dječjem vrtiću može se koristiti naziv kao što je odgajateljsko vijeće ili odgajateljski odbor i stručni aktiv.

Odgajateljski odbor čine svi odgajatelji, stručni saradnici i zdravstveni radnici koji ostvaruju program predškolskog odgoja u dječjem vrtiću.

Odgajateljski odbor sudjeluje u :

1. utvrđivanju prijedloga plana i programa rada dječijeg vrtića,
2. praćenju njegova ostvarivanja,
3. raspravljanju i odlučivanju o stručnim pitanjima rada,
4. poticanju i promicanju stručnog rada,
5. donosi godišnji plan i program rada dječijeg vrtića na prijedlog direktora i
6. obavljanju i drugih stručnih poslova iz svog djelokruga.

Djelokrug i način rada odgajateljskog odbora šire se uređuje Pravilima i drugim općim aktom dječijeg vrtića.

Član 53.

Stručni aktiv čine svi stručni radnici koji vode odgojne grupe istog uzrasta a obavlja sljedeće:

1. koordiniranje rada odgojnih grupa istog uzrasta,
2. poduzima potrebne mjere u cilju uspješnog realiziranja postavljenog plana i programa,
3. prati sveukupnu aktivnost djece u odgojnoj grupi i u vezi s tim predlaže odgovarajuća rješenja,
4. planira i prati realizaciju programa stručnog usavršavanja radnika i
5. obavlja i druge poslove iz svog djelokruga.

Stručnim aktivom predsjedava rukovoditelj aktiva a stručni rad koordinira pedagog ili drugi stručni radnik dječijeg vrtića.

VII. OPĆA AKTA DJEČIJEG VRTIĆA**Član 54.**

Dječiji vrtić ima Pravila kao najviši opći pravni akt. Pravila donosi Upravni odbor nakon pribavljenе saglasnosti osnivača i ocjene o saglasnosti Pravila sa zakonom i drugim propisom koju daje Ministarstvo.

Pravilima dječijeg vrtića bliže se uređuje organizacija, ovlaštenja i način odlučivanja pojedinih organa, vrste i trajanje pojedinih programa, uslovi i način davanja usluga, radno vrijeme dječijeg vrtića, javnost rada te druga pitanja od značaja za obavljanje djelatnosti i poslovanje dječijeg vrtića.

Dječiji vrtić pored Pravila ima i druga opća akta kojima se detaljnije uređuju određena pitanja u skladu sa zakonom, aktom o osnivanju i Pravilima, a donosi ih Upravni odbor dječijeg vrtića.

Član 55.

Dječiji vrtić pored Pravila dužan je donijeti i Pravilnik o unutrašnjoj organizaciji i načinu rada kojim se bliže uređuje unutrašnja organizacija, sistematizacija poslova i način organizovanja rada dječijeg vrtića u obavljanju djelatnosti predškolskog odgoja kao javne službe. Pravilnik o unutrašnjoj organizaciji i načinu rada dječijeg vrtića donosi Upravni odbor uz prethodno pribavljenu saglasnost osnivača, odnosno općinskog tijela uprave nadležnog za pitanja predškolskog odgoja.

**VIII. JAVNOST RADA I IMOVINA
DJEČIJEG VRTIĆA****Član 56.**

Rad dječijeg vrtića je javan.

Javnost rada ogleda se u pravovremenom i istinitom izvještavanju javnosti o načinu obavljanja djelatnosti predškolskog odgoja kao javne službe u skladu sa zakonom, aktom o osnivanju i pravilima i u ostvarivanju javnog interesa društvene zajednice kroz Upravni odbor i druge organe dječijeg vrtića.

Dječiji vrtić dužan je javno oglašavati na propisan način uslove i način prijema djece, pružanje svojih usluga kao i obavljanje drugih poslova iz djelatnosti predškolskog odgoja i biti otvoren i dostupan za javnost.

Član 57.

Javnost rada dječijeg vrtića odvija se kroz rad Upravnog odbora i obveznu primjenu planova i programa koje donosi Ministarstvo kao i u omogućavanju obavljanja svih vidova nadzora nad radom dječijeg vrtića od strane ovlaštenih organa i tijela.

Član 58.

Imovinu dječijeg vrtića čine pokretne i nepokretne stvari osigurane od osnivača, sredstva stečena pružanjem usluga, kao i sredstva koja su osigurana iz drugih zakonom predviđenih izvora.

Imovinom iz stava 1. ovog člana raspolaže dječiji vrtić pod uslovima i na način utvrđen zakonom i drugim propisom.

Član 59.

Dječiji vrtić koji obavljanjem svoje djelatnosti ostvari dobit obavezan je tu dobit koristiti za razvoj svoje djelatnosti u skladu sa zakonom, Pravilima i drugim općim

aktom. Dječiji vrtić može stići, opteretiti i otuđiti nekretninu ili drugu imovinu u skladu sa zakonom i drugim propisom.

IX. SINDIKALNO ORGANIZOVANJE

Član 60.

U dječijim vrtićima sindikalno organizovanje je slobodno i odvija se u skladu sa Zakonom o štrajku. Zaposleni u dječijim vrtićima mogu organizovati sindikalna udruženja u vezi s iznalaženjem boljih uslova rada, poboljšanjem socijalnog statusa, plata i drugih uslova života i rada.

Član 61.

U slučaju obustave rada, odnosno štrajka, štrajkački odbor, Upravni odbor i direktor dječijeg vrtića dužni su osigurati odgovarajuću njegu, prehranu, zdravstvenu zaštitu kao i drugu zaštitu o djeci koja se za vrijeme štrajka nađu u tom dječijem vrtiću.

Na pitanja ostvarivanja prava na štrajk primjenjuju se Zakon o štrajku ako ovim Zakonom nije drugačije određeno.

X. NADZOR

Član 62.

Inspekcijski nadzor i stručno pedagoški nadzor u dječijim vrtićima obavlja se u skladu s posebnim propisom koje donosi Ministarstvo.

Član 63.

Nadzor nad sprovođenjem ovog Zakona u dijelu koji se odnosi na program zdravstvene zaštite, prehrane djece i sanitarnih uslova obavlja Ministarstvo zdravstva Kantona. Nadzor nad sprovođenjem ovog Zakona u dijelu koji se odnosi na socijalnu zaštitu djece sprovodi Ministarstvo rada i socijalne zaštite Kantona.

Način obavljanja nadzora iz stava 1. i 2. ovog člana uređuje se i sprovodi u skladu sa posebnim propisom.

Član 64.

Ako nadležni organi u obavljanju nadzora utvrde da dječiji vrtić ne ispunjava zakonom propisane uslove, odredit će rok u kojem su dječiji vrtići i osnivač dužni otkloniti utvrđene nedostatke.

Ako dječiji vrtić u saradnji s osnivačem ne otkloni utvrđene nedostatke u ostavljenom roku, organ koji ih je odredio može donijeti akt o zabrani daljnje rada tog dječijeg vrtića. U slučaju iz stava 2. ovog člana troškove raspoređivanja djece u drugi dječiji vrtić snosi dječiji vrtić čiji je daljnji rad zabranjen, odnosno njegov osnivač.

Odredbe člana 62., člana 63., i člana 64. ovog Zakona

odgovarajuće se primjenjuju i na dječiji vrtić u privatnom vlasništvu.

XI. PRESTANAK RADA DJEČIJEG VRTIĆA

Član 65.

Dječiji vrtić prestaje sa radom ako ne postoji potreba ili ako ne ispunjava uslove propisane ovim Zakonom i drugim propisom za obavljanje djelatnosti predškolskog odgoja. Aktom o prestanku rada, odnosno ukidanju dječijeg vrtića određuje se rok prestanka njegova rada koji ne može biti kraći od tri (3) mjeseca, te uređuje način raspoređivanja djece u druge odgovarajuće predškolske ustanove, osiguravaju se uslovi za zaštitu imovine tog ukinutog dječijeg vrtića i regulišu se prava njegovih zaposlenih.

Član 66.

Akt o prestanku rada, odnosno ukidanju dječijeg vrtića donosi osnivač u postupku i na način predviđen ovim Zakonom, aktom o osnivanju i Pravilima. Odredbe stava 2. člana 65. ovog Zakona ne odnosi se na dječiji vrtić u privatnom vlasništvu.

XII. FINANSIRANJE DJEČIJIH VRTIĆA

Član 67.

Osnivač dječijeg vrtića dužan je osigurati sredstva za osnivanje i trajno obavljanje planiranih programa predškolskog odgoja u dječijem vrtiću.

Ako dva ili više osnivača zajednički osnivaju dječiji vrtić, sporazumno osiguravaju i sredstva za osnivanje i rad dječijeg vrtića.

Dječiji vrtić može osigurati sredstva pružanjem svojih usluga na tržištu, iz donacija, ostavštine, legata i iz drugih izvora u skladu sa zakonom.

Sredstva iz stava 3. ovog člana dječiji vrtić dužan je koristiti za potrebe razvoja osnovne djelatnosti.

Član 68.

Dječiji vrtić može dio cijene koštanja svojih usluga participirati od roditelja djece, odnosno korisnika tih usluga u skladu sa mjerilima koja utvrđuje i donosi općinsko tijelo uprave nadležno za predškolski odgoj.

Kantonalno tijelo uprave nadležno za poslove socijalne zaštite i općine mogu sporazumno na osnovu utvrđenih mjerila dječijem vrtiću pružati finansijsku pomoć u pogledu zaštite određenih kategorija korisnika usluga dječijeg vrtića.

Dobivena sredstva iz stava 1. i 2. ovog člana doznačuju se na račun dječijeg vrtića ili na drugi račun ako se tako predviđi mjerilima ili drugim pravnim poslom kojim

se uređuje odnos između davatelja sredstava i dječijeg vrtića.

Član 69.

Za izvođenje specijalizovanih, odnosno programa za djecu sa posebnim potrebama predškolske dobi iz člana 17. ovog Zakona sredstva se osiguravaju sporazumno između osnivača i Ministarstva.

Sporazum o načinu osiguravanja finansijskih sredstava iz stava 1. ovog člana, donose osnivač i Ministarstvo.

Član 70.

Na utvrđivanje i obračun plata i drugih naknada zaposlenih u dječijem vrtiću mogu se primjenjivati propisi kojima se uređuju plate i druge naknade nastavnika i drugih radnika u osnovnim školama ako su ti propisi povoljniji za zaposlene u dječijem vrtiću.

U ime zaposlenih sindikat pregovara i potpisuje kolektivni ugovor s osnivačem, odnosno finansijerom u vezi s platama i drugim primanjima zaposlenih u dječijem vrtiću.

XIII. DOKUMENTACIJA DJEČIJIH VRTIĆA

Član 71.

Dječiji vrtić obavezno vodi pedagošku, zdravstvenu i drugu dokumentaciju i evidenciju o djeci.

Obrasce, postupak, način i sadržaj vođenja pedagoške, zdravstvene i druge dokumentacije i evidencije o djeci u dječijim vrtićima propisuju i donose resorna kantonala ministarstva.

Sredstva za osiguranje obrazaca i eventualne dodatne troškove oko vođenja dokumentacije i evidencije iz stava 2. ovog člana snosi osnivač.

XIV. KAZNENE ODREDBE

Član 72.

Ako dječiji vrtić započne sa obavljanjem djelatnosti predškolskog odgoja prije nego što dobiju odobrenje za početak rada propisano ovim Zakonom i drugim propisima, kaznit će se za prekršaj novčanom kaznom od 200 do 2.000 KM.

Za prekršaj iz stava 1. ovog člana kaznit će se i odgovorna osoba u dječijem vrtiću novčanom kaznom od 100 do 500 KM.

Za prekršaj propisan ovim članom, uz novčanu kaznu može se izreći i zaštitna mјera zabrane rada dječijem vrtiću ili odgovornoj osobi, a može se izreći i određena zaštitna mjeradječijem vrtiću ili odgovornoj osobi u dječijem vrtiću.

Član 73.

Dječiji vrtić koji obavlja djelatnost predškolskog odgoja protivno načelima i uslovima utvrđenim ovim Zakonom i drugim propisom, kaznit će se za prekršaj novčanom kaznom od 200 do 1.000 KM.

Za prekršaj iz stava 1. ovog člana kaznit će se i odgovorna osoba u dječijem vrtiću novčanom kaznom od 100 do 400 KM.

Član 74.

Dječiji vrtić koji zaposli na provedbi programa predškolskog odgoja osobu koja ne ispunjava uslove utvrđene ovim Zakonom i drugim propisom ili zaposli osobu na način i u postupku koji je protivan zakonu, kaznit će se za prekršaj novčanom kaznom od 200 do 800 KM.

Za prekršaj iz stava 1. ovog člana kaznit će se i odgovorna osoba u dječijem vrtiću novčanom kaznom od 100 do 300 KM.

Član 75.

Dječiji vrtić koji ne dostavi nadležnom tijelu uprave Pravila i Pravilnik o unutrašnjoj organizaciji i načinu rada na davanje saglasnosti i ocjenu o usklađenosti sa zakonom kaznit će se za prekršaj novčanom kaznom od 100 do 500 KM.

Za prekršaj iz stava 1. ovog člana kaznit će se odgovorna osoba u dječijem vrtiću novčanom kaznom od 100 do 200 KM.

Član 76.

Dječiji vrtić koji ostvaruje programe predškolskog odgoja a ne učini dostupnim javnosti Pravila i Pravilnik o unutrašnjoj organizaciji i načinu rada dječijeg vrtića kaznit će se za prekršaj novčanom kaznom od 100 do 500 KM.

Za prekršaj iz stava 1. ovog člana kaznit će se i odgovorna osoba u dječijem vrtiću novčanom kaznom od 100 do 200 KM.

Član 77.

Dječiji vrtić koji obavlja djelatnost predškolskog odgoja u skladu sa ovim Zakonom i drugim propisom, a ne osigura pravovremeno i istinito izvještavanje javnosti o obavljanju djelatnosti u skladu sa zakonom, kaznit će se za prekršaj novčanom kaznom od 100 do 500 KM.

Za prekršaj iz stava 1. ovog člana kaznit će se i odgovorna osoba u dječijem vrtiću novčanom kaznom od 100 do 200 KM.

XV. PRIJELAZNE I ZAVRŠNE ODREDBE

Član 78.

Pedagoški standard i Normativ predškolskog odgoja iz člana 6. ovog Zakona Ministarstvo je dužno donijeti u

Hercegovačko-neretvanskog kantona

roku od godinu dana od dana stupanja na snagu ovog Zakona.

Do donošenja navedenih propisa pojedina pitanja predškolskog odgoja Ministarstvo može uređivati pojedinačnim odlukama.

Član 79.

Provedbene propise iz člana 20, člana 21, člana 28, člana 37, člana 38, člana 39, člana 62 i člana 71. ovog Zakona dužna su donijeti resorna kantonala ministarstva u roku od šest (6) mjeseci od dana stupanja na snagu ovog Zakona.

Član 80.

Do donošenja provedbenih propisa iz člana 79. ovog Zakona primjenjivat će se zatečeni provedbeni propisi ukoliko nisu u suprotnosti sa ovim Zakonom.

Član 81.

Odgajatelji i stručni saradnici koji su danom stupanja na snagu ovog Zakona zatečeni u radnom odnosu u dječjem vrtiću, a nemaju potrebnu vrstu stručne spreme mogu nastaviti obavljanje poslova odgajatelja ili stručnog saradnika, ali su dužni u roku od pet (5) godina od dana stupanja na snagu ovog Zakona steći propisanu stručnu spremu.

Medicinske sestre koje su danom stupanja na snagu ovog Zakona zatečene na radnom mjestu odgajatelja u dječjem vrtiću mogu nastaviti obavljanje tih poslova u odgojnim grupama do navršene djetetove treće (3) godine života.

Član 82.

Saradnici u predškolskom odgoju koji su danom stupanja na snagu ovog Zakona zatečeni na radnom mjestu odgajatelja u dječjem vrtiću, mogu nastaviti obavljanje tih poslova u odgojnim grupama do navršene djetetove treće (3) godine života.

Njegovatelji koji su danom stupanja na snagu ovog Zakona zatečeni na radnom mjestu odgajatelja u dječjem vrtiću, mogu nastaviti obavljanje tih poslova u odgojnim grupama do navršene djetetove treće (3) godine života.

Osobe koje su ranije završile školu za odgajatelja i koje su danom stupanja na snagu ovog Zakona zatečene na radnom mjestu odgajatela u dječjem vrtiću, mogu nastaviti obavljanje tih poslova u svim dobnim grupama.

Član 83.

Osobe koje su zatečene na poslovima predškolskog odgoja u dječjem vrtiću u privatnom vlasništvu, a nem-

aju odgovarajuću vrstu stručne spreme prema odredbama ovog Zakona, mogu nastaviti s obavljanjem tih poslova, ali su dužni u roku od 5. godina od dana stupanja na snagu ovog Zakona steći propisanu stručnu spremu.

Član 84.

Osobe iz člana 81. do 83. ovog Zakona mogu u drugom dječjem vrtiću zasnovati radni odnos i na neodređeno vrijeme ako se na konkurs ne jave osobe koje ispunjavaju uslove iz člana 28. stava 2. ovog Zakona.

Član 85.

Radnici koji na dan stupanja na snagu ovog Zakona rade u dječjem vrtiću kao odgajatelji i stručni saradnici, a nemaju položen stručni ispit, obavezni su položiti stručni ispit u roku od dvije (2) godine od dana stupanja na snagu ovog Zakona.

Odgajateljima i stručnim saradnicima prestaje radni odnos u dječjem vrtiću ukoliko ne polože stručni ispit u roku navedenom u stavu 1. ovog člana.

Član 86.

Dječiji vrtići dužni su uskladiti svoje registrovanje, rad, poslovanje i opća akta s odredbama ovog Zakona i drugim propisima u roku od šest (6) mjeseci od dana stupanja na snagu ovog Zakona.

Član 87.

Osoba koja je obavljala poslove dnevne društvene brige o djeci u drugoj porodici u skladu sa ranijim propisima, može nastaviti obavljanje te djelatnosti u sastavu dječjeg vrtića u kojem je zaposlena.

Član 88.

Fizičkim osobama kojima je odobreno obavljanje poslova čuvanja djece samostalnim ličnim radom ili kao sporedno zanimanje prema ranijem propisu, a koje te poslove prema odredbama ovog Zakona više ne mogu obavljati, prestaje pravo na obavljanje tih poslova istekom roka od godinu dana od dana stupanja na snagu ovog Zakona, što će rješenjem utvrditi nadležno općinsko tijelo uprave.

Član 89.

Dječiji vrtići su dužni najkasnije šest (6) mjeseci od dana stupanja na snagu ovog Zakona obaviti izbor direktora u skladu sa članom 47. ovog Zakona.

Direktorima izabranim prema ranijim propisima mandat traje do izbora direktora u skladu sa stavom 1. ovog člana.

Član 90.

Općinska vijeća nadležna prema mjestu sjedišta dječijeg vrtića odlučit će najkasnije šest (6) mjeseci od dana stupanja na snagu ovog Zakona o preuzimanju i dalnjem obavljanju osnivačkih, vlasničkih i drugih prava nad zatečenim dječijim vrtićima koji su osnovani prema ranijem propisu.

Član 91.

Danom stupanja na snagu ovog Zakona prestaje primjena ranije donesenih zakona, uredaba i drugih propisa o predškolskom odgoju na teritoriji Kantona.

Član 92.

Ovaj Zakon stupa na snagu osmog (8) dana od dana objavljivanja u "Službenim novinama Hercegovačko-neretvanskog kantona".

Bosna i Hercegovina

Federacija Bosne i Hercegovine

Hercegovačko-neretvanski kanton

S K U P Š T I N A

Broj: 02-01-XI-093/00

PREDSJEDNIK

Mostar, 27. juna 2000.

Omer Macić, dipl.eec. s. r.